




Бесжылдықтармен, онжылдықтармен өлшенбейтін дүние



Алға ұмтылу үшін санаға сілкініс керек. Ата-бабаларымыздың қарапайым өмір қағидасы осы. Оның үстіне, қазіргідей жат идеологиялар елімізге үлкен қауіп тудырып тұрған кезеңде ұлттық құндылықтарымызды жаңғырту аса қажет дүние екені айтпаса да түсінікті. Түптеп келгенде, мұны аға буынның өскелең ұрпақ алдындағы міндеті һәм парызы ретінде қабылдауымыз керек.

Осыдан төрт жыл бұрын Тұңғыш Президент – Елбасы «Болашаққа бағдар: рухани жаңғыру» атты мақаласы арқылы ел тұрғындарын рухани жаңаруға үндеп, көп жылдан бері көкейде жүрген мақсат-мұратымызды айқындап берді. Жетпіс жыл бойы, одан қала берді тәуелсіздіктің елең-алаңында жоғалтыңқырап алған ұлттық құндылықтарымызды қайта оралтуға деген мұндай қадам – талайымыздың санамызға сәуле түсірген дүние болды. Өйткені, бұған дейінгі мемлекеттік деңгейде қолға алынған жобалардың дені экономиканы, әлеуметтік және саяси салаларды дамытуға негізделсе, «Рухани жаңғыру» тұтас бір халықтың тұрмыс-тіршілігін, болмысын, салт-дәстүрін жаңғыртуды көздеді.

Елбасы өз еңбегінде рухани жаңғыруымызға аса қажет алты басымдықты айқындап берді. Олар: бәсекелік қабілет, прагматизм, ұлттық бірегейлікті сақтау, білімнің салтанат құруы, Қазақстанның революциялық емес, эволюциялық жолмен дамуы және сананың ашықтығы. Осы басымдықтардың ішкі өзегі іспетті «Латын қарпіне көшу», «100 жаңа есім», «Қазақстанның киелі жерлерінің географиясы», «Жаңа гуманитарлық білім: қазақ тіліндегі 100 жаңа оқулық», «Жаһандағы заманауи қазақстандық мәдениет», «Туған жер» жобаларының қай-қайсысы болсын, еліміздің жаһандану дәуіріндегі рухани кеңістігінің жаңа бастауы. Алайда, Елбасы айтқандай, жаңа тұрпатты жаңғырудың ең басты шарты – ол ұлттық кодыңды сақтай білуге келіп тіреледі. Ал, ұлттық кодымызды сақтау кеше-бүгін туындаған проблема емес. Бұл Елбасының ата-бабадан қалған мирасты жолды жалғап, сын сағатында ұлтына қайта ұсынып отырған киелі дүниесі деуге болады.

Біздіңше, рухани жаңғыру белгілі бір межемен шектелмей, үздіксіз жүзеге асып жатуы тиіс. Себебі, қазіргі ғылым мен технология аса жылдам қарқынмен дамып бара жатқан заманда ұлт ретінде рухымызды көтеріп, жаңарып, өркендеп отырмасқа лажымыз жоқ. Бір сәт мүлгіп кетсек, өркениет көшінен алыстап қаларымыз анық. Сол үшін рухани жаңғыру да экономикалық даму үрдісімен қатар жүруі керек. Ал, жаңғыру ісі бесжылдықтармен, онжылдықтармен өлшенбейтін дүние. Осы орайда жан-жағымызды ұлтшыл, елшіл, отаншыл жаңдар қаумалаған қоғам құра алсақ, онда рухани жаңғырғанымызды еліміздің өрбір азаматы өзі-ақ жан-төнімен сезінер еді.

Гүлназ АЛТАЕВА,

М.Әуезов атындағы ОҚУ-дың «Дене тәрбиесі және бастапқы әскери дайындық теориясы мен әдістемесі» кафедрасының аға оқытушысы.